

Lai fairainne.

Cîntche djûenes dgens di v'laidge étînt paitchis, è y é craibîn ché années po édie è baîti ïn grôs môtie dains ïn véjîn vâ. C'ât qu' nôs dgens craiyînt, mitnaint, en ran qu'ïn Dûe qu' s'était fait è coégnâtre poi son fé, l' Chricht. Els étînt dev'nis des chrétiens. Els s'étînt r'trovès d'aivô brâment d'âtres dgens que v'niînt d'ïn pô tot l' traivie di paiyis po faire ènne grôsse mâjon di Bon Dûe, ïn môtie. E y en aivait qu' saivînt dj' traivaiyie lai pierè, le bôs, le varre, le fie. D'âtres c'ment yos, n' saivînt ran faire d'âtche qu' yote métiè d' paiyisains, mains ès prâtînt yôs brais, yote v'lantè po s'édie.

Adjed'heû qu' le môtie était dj' bîn en train, qu'an poéyait dj' ïn pô vouere ç' que çoli v'lait bèyie, ès r'veniînt â v'laidge po dire bondjoué en yôs dgens, po aivoi quéques novèlles, pe po pâre ïn pô d' répét. Dains yote mairtche di r'toué, ès n'aivînt p' trovè l' temps grant. Es s' raicontînt yôs seuv'nis, les premies temps, tiaînd qu'ès n'aivînt ran fait qu' de creûyie lai tiere, d' tirie des pieres, obîn d' copaie di bôs. Pe, èls aivînt daivu poétchaie vou boy'vattaie tot çoli â bon yûe, qu'le soi, yôs mains étînt pieînes de saing, yôs dôs tâlès poi lai sô. Djemaîs ès n' s'étînt p' piains, c'était po Dûe qu' èls aivînt traivaiyie, qu'èls aivînt seûffri. Pe, vouere ces djûenes di Jura qu' ès n' coégnéchînt p' tus, qu'aivînt lai meinme craiyaince qu' yôs, çoli les aivait encoéraidgies po aidé émondure.

Chutôt, d' côte des crovèes de tchétche djoué, èls étînt dev'nis coégnéchous des métiès di bôs, di fie, d' lai taiye d' lai pierè, pe d' lai maiceinn'rie. L'yun d'yos saivait meinme yère pe faire ïn pian, ç'ât po çoli qu'ès l'aipp'lînt mitnaint l' Graiyon.

C' n'ât p' le tot, qu'ès s' diainnent en airrivaint bîntôt â v'laidge. Nôs n'ains p' aippris ïn valmon de tchôses po ran, nôs dains trovaie âtche de neû po nôs dgens, po les édie dains yôs bésaingnes. En péssaint d'vaint tchie lai Tçhairtrine, ès lai voyainnent écabreleûchie chus ïn roétchèt. Es s'aipprechainnent po yi dire bondjoué, mains n'en finéchînt p' de s'aippâre des novèlles. E paît les moûes pe les néchainces, è n' s'était quasi ran péssè d' nové â v'laidge.

Lai Tçhairtrine péssait l' pus grant d' son temps è meûdre di biè.

Dâs grant, nôs dgens maîndgînt dj' di pain. Po faire d' lai fairainne, èls aivînt ècmencie poi maitch'laie les grains d' biè d'aivô ïn pâta dains des échpèces d'étchéyes en bôs. Els aivînt âchi éprouvaie d' meûdre en péssaint ïn pâjaint rôlat en bôs chus ènne coutche de biè. Prou tôt èle aivînt airrâtè poch' que l' biè s' botait en moinnèe d'vaint l' rôlat qu' yi péssait poi d' tchus sains l' meûdre, sains comptaie tot l' biè qu' se predgeait en s'sivaint de tchétche sen di rôlat. Lai Tçhairtrine, lée, aivait trovè tot prés d' son bacu ènne roétche bîn piaintèe dains lai tiere, qu'était creûyie en d'tchus d'ènne prou grôsse tiuvatte. Elle lai rempiâchait d' biè pe en rôlaint ènne ronde pierè poi d'tchus, èlle écraissait les grains qu' bèyînt ènne belle grije fairainne. C'était du, lai pouère fanne était tote môve de tchâd.

E bîn, qu' dié l' Graiyon en lai Tçhairtrine, i crais bîn qu' nôs v'lans poéyait faire âtche po vôs, qu' vôs n'aiveuchînt pus taind d' mâ. Dûe sait b'ni, qu'yi réponjé lai fanne. Pe tchétchun r'venié en l'hôtâ.

Les cîntche djûenes dgens se r'trovainnent bîn s'vent. L' Graiyon n' râtaît p' de faire des pians pe d'échpyiquaie és âtres ç' qu'è s' musait. Pe, tiaînd qu'tot feut bîn çhai dains yôs têtes, ès s' botainnent â traivaiye. Les taiyous regu'nainnent po trovaie des boînes pieres, le mairtchâ fouerdgeait les bons utis, le m'nujie tchoijéçait l' bon bôs. Els aimoinnainnent tot çoli chus piaice, ïn pô c'ment po l' tchaintie di môtie mains bîn chur en pus p'tét. Tiaînd qu' tot feut prât, ès s' botainnent â traivaiye. Ces qu'aivînt traivaiyie po faire le grôs b'nâtiè taiyainnent ènne grante ronde pierè bîn piaite ch' les sens qu'èls aipp'lainnent lai dreumainne meûle. A moitan, èle feut creûyie, mains pe tot outre, po faire è t'ni aivâ ïn épâs rond pâ qu' serait r'teni enson en lai tchairpente di toit. Els aivînt fait tot âtoué de ç'te dreumainne meûle ïn épâs bodge po r'boussaie lai grainne, qu'èlle demoéreuse ch'lai meûle. Els taiyainnent âchi ïn pâjaint rôlat en pierè qu'ès poichainnent tot outre â moitan d'ïn p'tchus. L' mairtchâ

ençaché ci rôlat de çaçhes réyies en traivie. Els aipp'lainnent ci rôlat ènne ribe. Po faire è rôlaie lai ribe an y botont ïn échi en bôs bïn aiccretchie d'aivô ènne fouêteche bride en fie aiprés l' pâ.

Tot l' monde était li, bïn chur, po voûere l' premie l'émeu di m'lïn è biè. Lai véye mouniere è brais r'vâlé l' biè en ènne bèle coutche ch' lai dreumainne meûle. In hanne pregné l' bout d' feus d' l'échi pe boussé d'vaint lu. Lai ribe s' boté è virie âtoué d' l'échi en écraissaint les grains d' biè dôs lée. Coli f'sait ïn brut ïn pô c'ment tiaind qu'an greume. Lai Tçhaitrine cheûyait d'rie lai ribe d'aivô ènne écouve, po raimoinnaie â moitan d'lai dreumainne meûle les quéques grains qu' s'étint sivès de tchètche sen d'lai ribe. In côp d' rôlat d' pus, ces grains étint en yote toué âchi écraissès. En ran d' temps, ïn piein sait d' biè feut meûyè en bèle finne fairainne.

Bïn pus taid, l' soi en lai lôvrèe, les dgens n'en r'veniïnt p' d' ci tchaitre de pus d' yote hichtoire, tiaind qu'ïn contou aicmencait sai raiconte: « Cïntche djûenes dgens étint païchis po prêtaie yos brais, vôs saïtes, po baïti l' grôs môtie ... ».